

# Tutgagnar – cumportament nunadequat u mulesta sexuala?

L'emna passada è cumparida en la gasetta online GRheute ina brev averta nua ch'ina dunna descriva il cumportament d'in promient politicher. El l'ha tuttenina e nunspegtadamain tutgà en durant in aperitiv. La FMR ha discurre cun ina giurista ed ha vuli savair – independentamain da quest cas – co che «tutgarnims» èn insumma da qualifitgar.



Ella cussegla en dumondas giuridicas – Annetta Simeon da la centrala da cussegliaziun grischuna.

FOTO OLIVIA AEBLI-ITEM

CLAUDIA CADRUVI/FMR

Annetta Simeon è giurista e lavura en il center da cussegliaziun «beratungszentrum-gr.ch». Quel post dat pled e fatg en dumondas giuridicas da famiglia, lavur, locaziun etc. Annetta Simeon s'enconuscha ora en pliras spartas – dretg da lavur, dretg d'assicuranzas socialas, ma era en dumondas d'egualitad.

**FMR:** In enconuschent politicher grischun tschiffa da davosen ina dunna cun ils mauns enturn vita. El vi a moda malde-schenta si per ella. Las duas persunas n'enconuschan betg ina l'atra. Tge pensais Vos spontanamain, sche Vos udis quai?

**Annetta Simeon:** Quai ma para total dasperas. Sco politicher stuessan ins propi esser orientà davart moviments actuals sco #me too ed esser sensibilisà. E lura na sa cumportan ins propi betg uschia.

**Co descrivessas Vos quest departament?**

Sco «tutgarnim». El ha tutgà en ina dunna ch'el n'enconuscha betg – n'emporta betg cun tge intenziun. Quai na va betg. Sch'insatg uschia capita ina giada, lura sa perstgis san ins suenter.

**«La giurisprudenza n'è betg ina scienza exacta, nua ch'ins po definir exact ils cunfins.»**

Annetta Simeon,  
giurista

**È quai «be» in cumportament nunadequat? U èsi gia giuridicamain relevant?**

In cumportament nunadequat èsi senza dubi.

**Abstrahà da quest cas descrit en la brev averta da l'emna passada – datti en il cudesch penal insumma ina disposiziun che chastia «tutgarnims»?**

Igl è l'artitel 198 dal cudesch penal. I sa tracta dad ina surpassament che vegn persequità sulettamain, sch'i dat ina denunzia. Tgi che mulesta sexualmain ina persuna, vegn chastia cun ina multa – betg cun praschun. En il dretg da lavur datti dal reminent anc autras disposiziuns. Sche mulestas capitin durant la lavur, datti disposiziuns specificas tenor la lescha d'egualitad.

**En general – da tge dependi, sche «tutgarnims» valan sco mulesta sexuala sco descritta en il cudesch penal? U simplamain be sco cumportament nunadequat?**

Per exempel dependa quai dal fatg, sch'ins po cumprovar tge ch'è capità, quant nausch ch'igl è stà per las persuna pertutgada. Uschia che la procuratura publica è persuadida ch'il delinquent ha mess maun vi da la persuna – e dat pia ina multa.

**San ins definir quai pli precis?**

La giurisprudenza n'è betg ina scienza exacta, nua ch'ins po definir exact ils cunfins. Sch'insatgi tutga en cun intenziun ils organs genitals – saja quai ils primars u secundars – è la chaussa clera. Ma tutgar il givè n'è per regla anc nagina mulesta.

**I dat era cumportaments ch'èn simplamain nunadequats, dentant giuridicamain betg exnum relevant. Ils ultims diesch onns hai dà qua in grond svilup. Intgins cumportaments, gist tutgar en insatgi, ch'ins ha anc acceptà pli baud, vegnan resentids oz sco nunadequats. Cun buna raschun?**

Grev da dir. Da principi gea. Quel mument ch'ins tutga en ina persuna estra, surpassan ins atgnamain adina in cunfin. Mintgin resenta quai gea era auter, sch'insatgi tutga en. Il moviment #me too ha rendi conscient a talas situaziuns.

**«Sch'ins na po betg demussar u almain render avunda credibel il fatg, na vegn la procedura betg persequitada vinavant.»**

Annetta Simeon,  
giurista

**Co duai ina persuna – saja quai in um u ina dunna – reagir, sch'ella è pertutgada d'in cumportament nunadequat, damai da «tutgarnims»?**

Il meglier èsi dad immediat pretender pled e fatg dal malfatschent, da confruntar el, sche quai è pussaivel. Da scriver ina brev averta è era stà fitg curaschus. E sch'insatgi è sa senti offendi e degradà tras il gest, lura n'èsi betg d'excluder ina denunzia. Il meglier èsi dentant schon da reagir immediat. Forsa sa persetgisa la persuna gea era.

**Ma gist dunnas han savens tema da reagir, perquai ch'ellas audan lura «na sajas betg uschè sensibla» ubain «stoda emanza». Ed i po era capitar che las dunnas vegnan il davos sezzas inculpadas da dir manzognas.**

Quai datti. In grond problem è era che tals cas capitin per il solit tranter duas persunas «sut quatter egl», senza perditgas. Sch'ins na po betg demussar u almain render avunda credibel il fatg, na vegn la procedura betg persequitada vinavant. Ina dunna pertutgada resenta quai sco in uschènumnà Freispruch. Il tutgarnader mitscha. Quai fa effectivamain fitg mal ad ina persuna pertutgada. E che talas persunas sa nuspeschan perquai da far ina denunzia, quai chapesch jau bain.

## REPOWER

### Spetgà cun tensiun las nominaziuns – da Janom e Jochum

Barbara Janom Steiner e Giovanni Jochum duain representar il chantun Grischun en l'intepresa d'energia Repower. La regenza n'ha betg sezza dà enconuschent las nominaziuns. Ils dus nums èn vegnids publitgads la mesemna en il Fegl da commerzi svizzer.

CLAUDIA CADRUVI/FMR

Fin uss han Martin Schmid e Claudio Lardi occupà ils sezs dal chantun en il cussegl d'administraziun da la Repower. Pervi da la limitaziun dal temp remettan els l'uffizi. I sa tracta da posts lucrativs che vegnan tenor rapport da gestiun indemnisads fin a 90 000 francs l'onn.

#### Acziunaris elegian

Betg mo pervi da la bella indemnisaziun, mabain era pervi da l'importanza dal concern d'energia è la nominaziun vegnida spetgada cun ina tscherta tensiun. L'elecziun sco tala succeda però pir ils 17 da matg. Lura sa radunan ils acziunaris e las acziunarias da la Repower a la radunanza generala a Poschiavo.

#### Presidenta e podestà

Cun ils dus nominads ha la regenza tscherni capacitads specialisadas en differentas spartas.

Barbara Janom Steiner presidescha dapi il 2019 la Banca nazionale svizra. La politica è creschida si a Scuol. Ella ha studegià giurisprudenza ed ha lavurà passa diesch onns sco advoca independenta. Il 2008 è ella vegnida elegida en la regenza grischuna. La burgais-democrata ha timunà il departament da finanzas e vischnancas fin il 2018.



Ella presidescha la Banca nazionale Svizra e prest sesa Barbara Janom Steiner era en il pli grond concern d'energia dal Grischun.

FOTO OLIVIA AEBLI-ITEM



Il podestà da Poschiavo enconuscha gia bain la Repower. Giovanni Jochum ha lavurà en pliras funcziuns directivas en il concern d'energia.

FOTO MAD

Giovanni Jochum è president communal da Poschiavo. Il «podestà» politisescha era en la fracziun liberal-democratica dal Cussegl grond. El ha studegià economia da manaschi e revisiun a l'università da Son Gagl. Dal 2003 fin il 2016 ha el lavurà en pliras funcziuns tar la Repower, per exempel sco manader da la partiziun dals martgads u sco commember da la direzziun.

#### Repower en mauns publics

La Repower è ina societad d'acziun dal dretg privat. La maiorità da las acziun tutgan dentant direct- u indirectamain al maun public, sco quai ch'i resorta dal rapport da gestiun dal 2022. Uschia posseda il chantun Grischun 27 % da las acziun. Las Ovras electricas dal chantun da Turitg (EKZ) – era en maun public – tegnan 38 % da las acziun.

Il fondo d'investiziun CEIS da la UBS tegna radund 23 % da las acziun. Sulettamain var 12 % da las acziun vegnan commerziadas a la bursa.

L'onn passà ha la Repower cuntanschi ina svieuta da 4,7 milliardas francs e recaltgà gudogns da 46 milliuns.

Suenter la Alpica, la AXPO e la BKW è la Repower il quart grond provedider d'energia en Svizra.

#### Regenza na s'exprima betg

Il schaner passà ha il chantun scrit ora ils dus posts per il cussegl d'administraziun da la Repower. Sin la dumonda da la FMR tenor tge criteris ch'ils nominads sajan vegnids nominads, lascha la cussegliera guvernativa Carmelia Maissen be drizzar ora ch'i saja succedi tenor il criteris enumerads en l'insert dal schaner.

La regenza na s'exprima era betg davart il numer da las candidaturas inoltradas per ils dus posts tar la Repower.